



Lungz lauxsae dwg lauxsae son Sawgun caeuq Sawcuengh ban dou, hix dwg banhcujyin dou.

Lungz lauxsae hajcib bi baedauq, hoeng ndaek bwn' gyauej de lij ndaemlulu, lij cug diuzbwn lumj yiengmax. Bingzseiz daiq fouq nganxgingq he, lij dawz fwngz aen goenh, de gyaiez daenj buhyindung, loenglauq miz seiz hix raen de daenj vunj.

Couhdwg lauxsae bingzciengz baenzneix, de doiq dou hagsib iugouz gig yiemz; Daih' it, sijcih itdingh yungh gangbit. Dou daih' it ngoenz daeuj baudau, de couh daengq dou lo, byawz mbouj yungh gangbit sij cozyez, couh ngaiz linghsij. Gij iugouz neix, dou youq lajdiemj doeg sam bi mbouj caengz nyaengz gvaq, dou youq

lajdiemj yungh maz bit sij cungj ndaej. Hoeng Lungz lauxsae naeuz, yungh gangbit sijcih cih yawj gvai, caiq miz gyonj bit he bingz maeg he couh cwxcaih yungh ndaej baenz bi lai, hawj bohme hmbaet le haujai ngaenz ne; daihngaih, moix hwnj bien govwnz moq cungj iugiuz dou aeu yawjgonq. Baenzlawz yawjgonq? Lungz lauxsae son dou, aeu dawz cihmoq dwk bingqyaem, dawz de gyoebswz, caiq bang de ra "baengzyoux" cih doxlumj, miz aen swz lawz mbouj rox maz eiqsei aeu bae ra sawloih. Lij miz moix ngoenz de cungj dingqsij haj aen cwzcuj caeuq coenz vah ndeu, miz aen lawz sij loek le, mwngz couh gag nyinhcaen sij ndei geiq roengzdaeuq, mboujnex, mwngz couh rox daengz gijmaz nyaengz fangz daj rap lo.

Lungz lauxsae mboujdan hagsib iugouz doiq dou yiemz, youq veiswng h fuengmienh di he mbouj lujlaj, dieg baetranz ban dou byawz baet gizlawz de cungj faen daengz vunz, mwngz siengj caeg gik ngeix hix mbouj gamj ngeix. Ndaw ban ngoenz aeu baet sam mbat, dieg naengh byawz uq le gag gipseuq, neix lij mboujsuenq lienz dou dahsau bwn' gyauej moix aen singhgiz aeu swiq geijlai mbat de cungj iugouz aeu guh daengz. De ciengz doiq dou naeuz, veiswng h mbouj guhndei, yungzheih miz bingh, baenz-bingh aeu yungh ngaenz yw mbouj suenq, lij nguh hagsib sou. Gou ngeix lauxsae gangj ndaej deng, couh lumj bi' gyai miz sinhgvanh bingh-doeg, haihag baenz song ndwen le dou cix ndaej dauqma hagdangz doegsaw, ngeix daengz aen hageiz haenx, ndawsim couh gag liengz lo.

Lungz lauxsae couhdwg yienghneix hawj dou gingqgyaez, gou ndawsim laeb roengz gietsim: Majhung le hix lumj Lungz lauxsae ityiengh ma lajmbanj sonsaw.

(Vujseinh Yen Dungzlingi Cin Sinhlungz Siujyoz seiq nienzgaep Veiz Veivei boux lauxsae son' gyauq Lungz Ging'yuz)

Aen Simmuengh Gou

我的心愿

Bouxbox cungj miz aen simmuengh de, miz vunz siengj guh gunghcwngzsw, vih gensez guekcoj ok di rengz; miz vunz siengj guh giyezgyah, vih hwngfat ginghci guekcoj ok faenh rengz; miz vunz siengj guh lauxsae, vih guekcoj gungganq daih vunz moq. Hoeng aen simmuengh gou dwg guh boux canghyw.

Gou miz gvaq simmuengh lailai, siengj guh canghyw dwg aenvih binghra q binghbwt sinhgvanh. Mwh ngamq miz cungj binghra q neix, sinhvwnz ciengzseiz bauq naeuz mbangj vunz baenz cungj bingh dwglau neix dai bae lo. Sim gou hoj youq lai, cix bang mbouj ndaej saek yiengh. Doeklaeng, yihyoz gohyenz yinzyenz rox ndaej aen "baexmaed" binghdoeg, guh ok aen fueng' anq yw bingh, lij cauh ok yizmyauz dem. Mwh neix, gou roxnyinh canghyw dwg hangz hong hungmbwk, miznaj youh dwgrengz ndeu. Canghyw ndaej hawj bouxbingh ndang dauq cangq, ndaej hawj boux baenzbingh naek youh diuqdedded, yienghneix aen simmuengh gou couhdwg guh canghyw lo.


Danghnaeuz gou ndaej guh canghyw, gou siengj guh ok cungj yw ndeu, aeu daeuj yw cungj bingh seizneix yw mbouj ndei caeuq cungj binghdoeg caengz rox, hawj doenghdz caeuq vunzlai noix baenzbingh, ndaej ndang cangq ndang geng. Guh boux canghyw, aeu gwn ndaej hoj, bungz daengz saeh hoj, mbouj ndaej lau, engq mbouj ndaej mbouj bae guh, aeu mbouj doeknaiq, mbouj lau hojnanz, buekrengz bae guh. Guh boux canghyw, aeu rox naemj vihmaz guh mbouj baenz saeh caeuq rom gingniemh, mbouj ndaej mbat guh mbouj baenz saeh ne couh doeknaiq nini.

Mbat miz simmuengh ne, couh aeu haenqrengz buekguh, maj hung maj ak, caux ngoenz ndei hawj vunzlai. Gou siengj guh boux canghyw, seizneix couh aeu roengz-rengz doegsaw, hawj "aeu gou hag" bienq baenz "gou aeu hag", vih aen simmuengh neix haenqrengz buekguh.

(Bwzswz Si Yougyangh Gih Yizfuh Siujyoz roek nienzgaep (1) ban Hij Lozvanz raiz Yangz Yenlinz hoiz)

Hag Gwih Danci

学骑自行车



Mwh sujgyaj, gou raen daeggo gwih danci suglili, hozhaenz raixcaix, yienghneix gou laemxsim hag gwih danci.

Singhgiz roek, daxboh daiq gou bae daengz aen gvangjczangz iq hag gwih danci. Mwh ngamq gwih hwnjbae ne, aenci lumjnaeuz mbouj dingq gangj, gengz gvaz gengz swix, gou naengh hix naengh mbouj onj saekdi, caeklaiq daxboh fuz aen dieгнаengh. Gou laebdaeb gaem dawz gaenzci, din yungh rengz caij gaiq caijci, aenci nduknduk ndiengqndiengq hai baenaj, lumj gwn laeuj fiz nei. Gou sim gaenj raixcaix, angfwngz gaem gaenj gaenzci cungj ok hanh lo, lauhei q mbouj siujsim couh deng laemx. Hoeng lau fangz bungz fangz, youq dieg vangok, aen gyauejci sawqmwh gengz coh mbiengjswix, couh laemx roengzdaeuq lo, gou hix gaen laemx lo, angfwngz lij deng log di naeng, roxnyinh sepyanyan. Yawj fwngz deng sieng

gou, gou naemj: Gou gaenq siujsim hag dangqmaz lo, lij deng laemx, caen naemj mbouj daengz hag gwih danci baenzneix hoj, rox mbouj hag loba!

Daxboh lumjnaeuz yawj rox gou naemj gijmaz, gujli gou naeuz: "Mwngz cij ngamq hag, laemx saek baez cingqciengz lai lo. Daeuj, gou bang mwngz nem ndei gaiq yw canggojdeh, couh mbouj in lo. Gwih danci aeu lai lienh geij baez couh rox baenzlawz hawj de doxbingz lo. Hag doxgaiq cungj dwg daj mbouj rox daengz rox, ndawgyang aeu laebdaeb lienh, cij ndaej suglienh." Gou dingq le, naemj: Daxboh naeuz ndaej deng, gou ngamq hag, guhlawz baenzneix vutvet ne? Yienghneix, gou youh hainduj dauqcungz hag gwih danci.

Daxboh fuz aen dieгнаengh, gou fwngz gaem gaenzci, din caij gaiq caijci, aen danci laebdaeb mbitmbit mbiengmbieng hai baenaj, mwh gaenzci gengz coh mbiengjswix, aen-ndang hix gaen gengz coh mbiengjswix, naemj daengz haxbaenh, gou doq niuj aen gaenzci coh mbiengjgvaz, aenndang hix gaen cingq gvaqdaeuq, caen yungyiemj lai ha! Goj lienh goj lienh gou rox baenzlawz cij ndaej hawj aenci doxbingz: Danghnaeuz gyauejci gengz coh mbiengj, doq dawz gyauejci niuj coh mbiengj wnq. Couh yienghneix, baengh gij neix, gou couh mbouj lau laemx lo.

Doeklaeng, ngoenznaengz baez ndaej-hoengq, gou couh roengz laeuz lienh gwih ci. Roengzrengz geij ngoenz, gou hag rox gwih danci lo. Seizneix, gou gaenq caeuq daeggo caemh gwih ci ndaej lo!

(Gyanghsuh Swngj Suhcouh Si Gauhsinh Gih Sihsanh Saedniemh Hagdangz Yiz Yajgiz)